

HBko mahaikide presoek hirugarren gradua ematea aztertuko du Gobernuak

Orain arte euskal presoek kolektiboak uko egin dio bide horri arbitrarioa delako

Erredakzioa / Donostia

Espainiako Gobernuak HBko Mahai Nazionalako kide presoek egoera erabili nahi du egoera politiko berriari aurre egiteko, eta hirugarren gradua emateko aukeraz baliatzeko asmoa du datozen egunotan. GALEko kondanatuei indultua eman ondoren, HBko mahaikideak kalean ikusi nahi ditu, baina orain arte presoek kolektiboak gaitzetsi duen bide bat erabiliz: hirugarren gradua.

URTARRILEAN aztertu asmo du Espainiako Gobernuak HBko mahaikide presoek egoera, hirugarren gradua emateko aukera baliatzeko edo ez. Joan den ostegunean, *El Correo Español* egunkariak aurerratu zuen asmo hori. Egun berean, Jaime Mayor Oreja Barne ministroak nabarmendu zuen ez dela erabakirik hartu, baina onartu zuen hamabost egunen buruan gaia aztertzea posible izango zela. Atzo, berriz, Europa Press agentziak ziurtzat eman zuen Basauri, Langraiz, Martutene eta Iruñeko espetxeetako batzordeek aztergai izango dutela mahaikideen egoera.

Barrionuevori, Verari eta GAL auziko beste kondanatuei indultua eman ondoren, HBko mahaikide presoek egoera hartu du helburutzat Espainiako Gobernuak, kon-



ALBERTO MARTIN / EFE

Mayor Oreja Barne ministroak Maratalazko poliziak agurtu zituen urte berri ona opatzeko.

pentsazio gisa eta su-eten egoerari aurre egiteko tresna gisa.

Dena den, oso bide interesatua hartu du: hirugarren gradua. Hirugarren gradua ematea Espetxe Zuzendaritzari dagokio, preso bakoitzaren portaera aztertuta. Orain arte Euskal Preso Politikoen Kolektiboak uko egin ohi dio hirugarren gradua onartzeari, oso modu arbitrarioan eskaintzen delako eta txantaje gisa erabiltzen delako (izan ere, gehienetan damua adieraztearekin lotu izan dute). Horrez gain, mahaikideen

kasuan, gainera, ate hori erabiltzea bidegabea izan daiteke beste presoekiko, batez ere zigorraren hiru laurdenak bete dituztenentzat, jakinik oraindik sakabanatuta eta urrun daudela.

HBk, ordea, uste du mahaikideak beste bide bate-

tik kaleratu behar dituztela: Auzitegi Konstituzionalak kondanatuek jarritako errekursoaren argudioren bat ontzat ematean, hau da, Auzitegi Gorenak jarritako zigorra indargabetzean. Erabaki hori lehenbailehen hartzeko eskatu berri du HBk.

Lehergailu bat jarri dute Gasteizko banketxe batean

■ PPko kide baten etxea harriatu dute Bilbon

Agentziak / Gasteiz-Bilbo

LEHERGAILU batek eztanda egin zuen atzo goizaldean Gasteizen, BBV banketxeke diru-emaile automatiko batean. Udal-tzaingoaren arabera, lehergailua etxean egindakoa zen eta ez zuen suterik sortu. Eztanda kalteak eragin zituen sarrerako atean. Suhiltzaileak Venezuelako bulego horretara joan ziren, baina, suterik ez zenez, izan ez zuten esku hartu.

Bestalde, burua estalita zeramaten lagun batzuek Gonzalo Fernandez PPko Gazteriaren buruzagiaren etxea harriatu zuten atzo goizaldean Bilbon. Eraso goizaldeko ordu bata eta laurdenean izan zen, eta ondorioz etxeko kristal guztiak hautsi ziren. PPko kidea etxean zegoen bere familiarekin urte berriaren etorrera ospatzen. Amurrión (Araba), berriz, PPko hiru karguren kontrako pintadak agertu dira. Udalak ezabatzeko agindua eman zuen atzo bertan. PPren ustez, presoak hurbilazteko estrategiaren barrukoak dira erasoak.

Chiracen mintzaldiaren zati batzuk nabarmendu ditu EAJk

■ Zati horiek kargudun politikoei igorri dizkie

Eneko Bidegain / Baiona

JACQUES CHIRAC Frantziako Errepublikako lehendakariak mintzaldi bat egin zuen abenduaren 4an Bretaniako Eskualde Kontseiluan. EAJko Ipar Buru Batzarrak hitzaldi horren zati batzuk igorri dizkio Iparraldeko zenbait kargudun politikori, hala nola hiru diputaturi eta bi senadoreri, Ipar Euskal Herriko kontseilari nagusiei, Baiona, Angelu, Miarritze, Donibane-Lohizune eta Hendaiako auzapezei, Pirinio

Atlantikoetako prefetari eta Baionako suprefetari.

Chiracek bretoiaren aldeko hitzak izan zituen, eta erran zuen nahi duen orok izan behar duela hizkuntza horretan ikasteko aukera. «Nazioak lehentasuna gorde behar badu ere, izate erregionalaren agertzeak ez du kezkatu behar». «Estatuak definitu kokaleku uniforme bat inposatzeko ordez, legeak tokiko aktoreei iniziatibak hartzeko ahalak emanen dizkien tresnak asmatu behar ko ditu».